

天一閣藏明代方志選刊

天一閣藏明代方志選刊

保定郡



重脩保定志序

保定知府章君律以郡志
一編走書徵序蓋前志殘
缺政務之暇偕屬邑涑水
教諭張才輯而成之者也
志凡廿五卷首圖次表圖

著其槩而表書其詳一郡
三州十七縣城郭鄉村風
俗形勝山川人物忠賢節
義開卷瞭然藉是可以攷
古證今可以懲惡勸善誠
有益於治道有補於風化

其用心勤矣古之善為政者非以役志簿書為能而以留心文事為賢所謂儒術飾吏事是也章君舉甲戌進士歷秋官貲外出守大郡剴裁繁劇才識超然

用能於民生樂業之餘興
舉學政激引士類敦崇化
本而又博采聞見增脩是
志使文獻足徵垂示有永
非賢而能之乎雖然保自
召公封國以前為幽冀之

域厥後羸秦兼併楚漢分
爭隋之慕容唐之祿山皆
嘗竊據其地五代石晉至
割以賂遼宋金構兵迄無
寧歲胡元入主幾為左袵
迨我

聖明繼天出治汎掃腥羶誕
興禮樂遂使幽冀之名區
復為畿甸之樂土斯世斯
民何其幸耶然則郡志之
作非徒紀事雖

帝德王功足以追配唐虞三

代之盛者亦於是而有見
焉覽者其毋忽諸

成化八年歲次壬辰冬十
一月之吉

資政大夫兵部尚書兼翰
林院學士知

制誥

經筵官淳安商輅序



保定府新志序

保定古燕趙之地今

畿內郡也所統州三縣十有
七其間故實散見於載籍多
矣然自前代未有彙粹為志
刻以遺後者得非唐末五季
之亂宋金元兵燹之餘文獻

落莫而然歟仰惟我

國家定鼎幽薊斯民漸濡

聖化亦已有年禮樂文物大非昔

比夫以

帝畿劇郡又當文盛之時而志弗

修誠缺典也予每惜之欲詒

於牧民者冀有所用意第未

及發焉成化丙戌郡守東吳
章侯律由刑部貲外郎來任
未幾均徭平賦勸農興學凡
百廢弛無不脩舉乃暇日因
閱永樂舊志嘆其疎畧謀於
僚案欲加纂輯衆咸曰茲盛
事誠不可以已者遂召其屬

涑水教諭張才俾任其事仍
為商其凡例訂其取舍自地
里山川而下以至食貨學校
名宦人物之類靡不博采詳
究芟繁撮要挈綱分目有倫
不紊而又總其形勢遠近建
置先後分合之故作為圖表

以冠諸首俾覽者便焉凡四十卷由是文采一新事蹟增舊興替可鑑勸戒攸存叅之古輿地家良可取焉是舉也非張君用心之篤固不足以成侯之志非侯明於治體知所當務其何能使一郡之事

晦於前而顯於後若是哉侯
將鉉梓以傳既謁學士商先
生為之序復不鄙謂予宜有
言予方獲覩成編喜慙素願
諾而未復而侯用薦去任久
矣至是繼守江夏劉侯觀倅
來促文嗟夫保定為郡古今

同此山川也同此景物也然
昔之畧今之詳昔之晦今之
顯是固為

國家文盛之驗亦由表章之有
其人爾語云地因人而勝又
云其人存則其政舉然則繼
是而往使仕于此與生乎此